

## Hronika / Chronik

### Izvještaj o radu Centra za balkanološka ispitivanja ANUBiH u 2018. godini

Aktivnosti Centra za balkanološka ispitivanja ANUBiH tokom 2018. godine uglavnom su bile usmjerene na izdavačku djelatnost. U okviru raspoloživih mogućnosti radilo se i na obradi arheološkog materijala, kao i na završnoj pripremi digitalne prezentacije kartoteka iz okvira balkanologije koje su u prethodnom periodu oformljene u okviru naše institucije. Prvu polovinu godine obilježilo je štampanje i distribucija Godišnjaka/Jahrbucha br. 46 za 2017. godinu, a u drugom polugodištu su prikupljeni i obrađeni radovi za Godišnjak/Jahrbuch br. 47 za 2018. godinu. Uz redovne rubrike, ovaj broj sadrži i priloge koji su prezentirani na prvoj PeBA-konferenciji (*Perspectives of Balkan Archaeology – The Early Iron Age: Methods and Approaches*) koja je održana u Zemaljskom muzeju Bosne i Hercegovine u Sarajevu 8–9. aprila 2016. godine. Pripremu i štampanje časopisa je i ovoga puta podržalo Evroazijsko odjeljenje Njemačkog arheološkog instituta. Značajnu finansijsku pomoć pružili su Fondacija za izdavaštvo Sarajevo, Federalno ministarstvo obrazovanja i nauke, kao i Zentrum für Antike Welten iz München-a.

Tokom 2018. godine nastavljeno je s radom na štampanju istorijskih izvora za srednjovjekovnu Bosnu, autora prof. dr. Esada Kurtovića. Riječ je o drugom tomu knjige "Izvori za historiju srednjovjekovne Bosne (Ispisi iz knjiga kancelarije Državnog arhiva u Dubrovniku 1341–1526)" koji sadrže arhivsku građu iz serije *Debita notariae* (Knjige zaduženja). U ovoj fazi pripreme publikacije za štampanje najviše se radilo na pronalaženju finansijskih sredstava. S obzirom da Akademija nema mogućnosti samostalno finansirati ovo izdanje, prihvaćena je ponuda Historijskog arhiva u Sarajevu i Instituta za historiju u Sarajevu za zajednički rad na štampanju ove vrijedne publikacije. U tom smislu su obavljani i prvi razgovori, te se nadamo da će štampanje drugog toma "Izvora" u dogledno vrijeme biti privedeno kraju.

Također, radilo se na pripremi drugog toma izdanja "Lične zabilješke generala Oskara Potioreka o unutrašnjopolitičkoj situaciji u Bosni i Hercegovini (period od jula do početka I. svjetskog rata 1914. godine)" koji pripremaju akademik Dževad Juzbašić i prof. dr. Zijad Šehić. U toku ove godine prikupljen je najveći dio Potiorekovih rukopisa u Bečkim arhivima, a prikupljanje i obrada ovog materijala biće završeni u sljedećoj godini.

U saradnji s Arheološkim institutom Filozofskog fakulteta Univerziteta u Sarajevu u ovoj godini se pristupilo sistematizaciji arheološke građe koje je sakupljena tokom istraživanja našeg Centra na Glasinačkom području u vremenu od 1975. do 1990. godine. Uglavnom se radi o materijalu iz gradinskih naselja koji je tokom ratnih godina nekoliko puta premještan, te je došlo do djelimičnog gubitka popratne dokumentacije. Na osnovu inventarskih knjiga i dnevnika iskopavanja uspješno su identificirani i razvrstani nalazi iz Gradine Ilijak, a u narednoj godini će se raditi na sistematskom pregledu i razvrstavanju nalaza iz naselja Kadića brdo na kome su obavljena sistematska istraživanja šireg obima, kao i na nalazima iz drugih glasinačkih naselja. Ovaj posao su uz konsultaciju s prof. dr. Balgojem Govedaricom u ovoj godini obavile saradnica Centra, Sabina Vejzagić i studentice s Arheologije s Filozofskog fakulteta u Sarajevu, Maida Turkmanović i Dženefa Merdanić.

Veoma značajan segmenat ovogodišnje aktivnosti odnosi se na finalnu pripremu web prezentacije dva korpusa kulturno-istorijske građe na kojima su angažovani saradnici našeg Centra. Radi se o kartoteci "Grobovi prastanovnika sjevero-zapadnog Balkana" koju je svojevremeno inicirao dr. Zdravko

Marić u saradnji s Blagojem Govedaricom i Seadom Čerkezom. Materijal je već odavno sakupljen i sistematizovan. Međutim, rad na elektronskoj finalizaciji tih podataka odvija se s dosta poteškoća, uglavnom zbog nedostatka finansijskih sredstava.

Novi član našeg Centra, prof. dr. Lejla Nakaš također se uključila u rad na elektronskoj prezentaciji kulturno-istorijske građe s našeg prostora, projektom digitalizacije crkveno-slavenskog rječnika. Građu za ovaj rječnik najvećim dijelom je sakupila prof. dr. Herta Kuna u periodu do 1990. godine. Elektronska građa je već kompletirana i sada je potrebno napraviti web stranicu za pretraživanje različitih varijanti glagoljičkih i ćiriličkih tekstova. Oba projekta digitalizacije na kojima se radi u našem Centru biće prezentirana na novoj web stranici Akademije nauka i umjetnosti BiH, čime će se u znatnoj mjeri olakšati pretraživanje podataka i šire istraživanje bitnih elemenata duhovne kulture, kako iz perioda srednjeg vijeka, tako i iz dalje prošlosti našeg prostora.

Sabina Vejzagić